

# LIS PREDICJIS DAL MUINI

di pre Josef Marchet - Udin, 1965

## La dolce vite di Gargagnà

Doman e scomence la Cuaresime, ma il plevan nol à predis di mandâ a Gargagnà di Sore. E inalore, cristians, se o vês voie di cjapâ la cinise, us tocjarà di fâ cuatri pas a rivâ jù in Plêf.

Chest al è il prin avîs. E cumò o 'nd ai un altri di dâus. Auturo Baduscli, fi legitim e naturâl dal ustîr Florean - daûr la anagrafe - in chel che o vignivi sù par dongje de sô "Premiata trattoria Roma con vini e licuori" al mi à fermât di lontan e al mi à sberghelât - Oh Vigji, parcè no publicaiso in glesie che usgot o vin il velion achì di nô? - E jo, cjalaît po, i ai spesseât a rispuindi: - Juste, siôr Turuti, juste: al à fat ben a vêmal iniment: no mancjarai -. E cumò o soi ca a dîus che, par vie dal ultin di carnevâl, ancje la innomenade vile di Gargagnà di Sore, e varà la sô manifestazion, cuntun grant bal, intai salons di trê pas par cuatri, dal nestri esimi citadin Florean Baduscli. Un pitôr fat vignî di Udin al à lavorât trê dîs a tacâ pipins su pai mûrs e a picjâ curdelis di cjarte sot il sofit; Meni Polche al vignarà a screâ la armoniche gnove resinte, di chês cui taiadeis blancs e neris che e semee un organut; un gjornalist al sarà presint, cul librut des notis e un lapis gnûf, a tirâ jù il non e sorenon des plui zentîls balarinis e dai cavalîrs plui morbinôs, par puartâju su la croniche de provincie... Si sa po: robonis alì di Baduscli.

Ma jo, la croniche us e fâs dal moment, prin che e tachi la cavalchine. La plui sgherle e dispatussade des pulzetis e sarà mê gnece Silvana di Babacje, che e semee un sac di spongje (otante kilos di spongje a son, in zornade, passe cent mil francs: gno cusin, Babacje di Pauli, nancje no si insumie di vê un capitâl di chês sorte in cjase sô!). La plui inscuelade tal menâ lis cjarculis e sarà la Vera de Gnoche, che e à pierdût il pèl dal cjâf za fa tancj agns, in chês volte de liberazion: cumò e je madurote, restaurade, imblecade, imbrucjate e sofitade, ma i sghirets ju à in mò in ordin: la love e pierd il pèl ma no il vizi, al dîs il talian. La tierce e varès di sei Cuncetine, la femine dal barbîr calabrês, mucule, tofule, trepule, cracule, che e pirla come une bale di gome: ma o ai pôre - magari cussì no! - che no puedi vignî par vie dal om gjelôs di chel sgurli alì, co al è bon di vignî a cjolile sul plui biel! E se no ven Cuncetine, il tierç scjalin i tocje a Vilma di Strassarie, cu lis talpis a doi di baston e il cjâf insom di un mani di scove: chês e cjamine impicotide tant che une arciduchesse e tal balâ e je plene di sgrimie come il caporâl dal zûc dai çoncs. Po dopo a rivaran chês di sedis agns: Mariuline di Sgranf cu lis mans come palotis, Rosoline Paronzine cul nas a patatine, Gjuliane Trasagane colôr de melanzane, Vanda di

Bortolat cui cjavêi di panole, Antoniete di Scjalete intrigade a puartâsi daûr la dote dal Friûl che le à spettacolose... Mi dismenteavi di siore Malie de Scuarçarie che, cun ducj i siei cincuante e passe, si lusinghe di fâ inmò gole a cualchi temul: biade la ore che e à maridadis lis fiis che a pandevin la sô etât!

Oh mo! E i masclis indulà ju metino? Turo Baduscli, che al pâr un stadei, al pararès bon cun mê gnece che e semee un glimuç di stope. Silvio de Parusse che al si môf come un uciel di plomp al varès di fâ la mazurche cun Vera de Gnoche che i fasarès vignî l'inzirli. A Santin dal Fôr, che al è lunc tant che il jubâl di Cuarnet, i larès di gale la Beatrice di Randin: e pararès une simie che e cîr di rimpinâsi suntun len. Sergjo Uaine al va ben cubiât cu la Vilma: par balâ cun jê, al scuén montâ suntune cjadree. A Roseline, che e à ogni dì un rafredôr gnûf di scree, si podarès dai Medeo Cuarin che al odore di mussulin... E la Trasagane e va compagnade cul Ros di Tai che al pâr une coce di S. Roc: cocis e melanzanis a son di chê famee stesse. E se e vignìs la Cuncetine, bisugnarès molâle cun Gjani Stiche che al à chê biele cjaveade zale: polente e tocjio al vignarès a jessi. E par finîle, a Florean, ustîr e paron dal vapôr, i reste siore Malie, che nissun i e puarte vie, dal sigûr: a son trente agns che lui la pare ator.

O ai finît. O speri che siôr Arturo al sei content de publicitât che o ai prometût di fâ e che o ai fate pal so velion. O soi un om di peraule. E cun cheste peraule us doi la buine sere.